

## «Penibel, mia mamma va era a l'Open Air – tge duai jau far?»

Damaun èsi uschè lunsch: Il 36avel Open Air Lumnezia avra sias portas, suenter dus onns pausa da corona. La FMR ha tadlà enturn tar la giuventetgna rumantscha (u forsia er betg?) e respunda qua a las dumondas las pli «urgentas» – e forsia era main urgentas.

Sandro Buchli/FMR

Suenter dus onns pausa da corona ha'l puspè lieu a Degen, l'Open Air Lumnezia. Ed i vegn chaud, sco ch'in sguard sin la prevista da l'aura tradescha. Er quest onn porscha l'Open Air puspè blera musica, blera culinarica e blera festa. Ina ni l'otra dumonda è però anc averta – e quellas respunda la FMR cun gaudi e cun ina tschegnada.

Cainer Tuleppaner, Tersnaus, 16 onns: Hilfe, penibel – mia mamma va era a l'Open Air Lumnezia. Co vegn jau d'evitar il meglier da scuntrar ella?

**FMR:** Char Cainer Tuleppaner. Emprova oz anc da persvader tia mamma da betg vegnir! Quai saja insatge per glied giuvna... Ma quai na vegn detg segir betg a gartegiar. Segund tip: Parca tia tenda uschè lunsch davent sco pussaivel dad ella. Ma er qua: La schanza è pitschna. A l'Open Air van baingea blera glied, ma uschè grond n'esi dentant er betg. Terz tip: La suletta garanzia per betg vesair tia mamma: Resta a chasa e giuda la buda vida! Ma hey, la fin finala n'esi er betg uschè mal da far in viva cun ella! «Paja in drink ad ella», ha dal rest manegià la responsabla per las medias *Catia Tschuor* envers la FMR.

Carlina Campari, Camischolas\*, 17 onns: Jau hai pir 17 onns, bavess però exnum ed extrem gugent in campari cotschen cun mia megliera collega, perquai ch'ella ha gist a fin l'emprendissadi. Co duess jau far quai il meglier?

**FMR:** Chara Carlina, usché simpel nun è quai. Las reglas che valan numnadamain uschiglio cun il consum d'alcohol valan natiralmain era a l'Open Air Lumnezia, qua na datti betg bler da martgadar. Il persunal da l'Open Air po era controllar tia carta d'identidad. Tip dus: Resta tar la biera e tar il vin, quels datti era gia davent da 16 onns (u na baiva simplamain nagut!) Ed anc in pitschen tip: Betg maschadar las bavrondas, uschiglio has ti be mal la testa l'auter di. Ed anc in tip: Tenor ils organisateurs (Catia Tschuor) èsi il meglier da baiver blera'aua, i vegn numnadamain fitg chaud! Amez il Open Air datti perfin ina gronda funtauna, nua che in e scadin po vegnir a baiver au.

Alfonsina Campanella, Marmorera, 21 onns: Merda, jau hai gia cumprà liongias e tirc per mia gang da 20 personas – ed ussa hai jau legì sin la pagina d'internet ch'i valia in scumond da fieu a l'Open Air. Tge far?

**FMR:** Chara Alfonsina. I dat ina simpla schliaziun – numnadamain prenda tut tes urden e va tar il gril public, l'uschenumnà «stützigrill». La pudais ti e tia gang grillar vossa roba per dus francs – ed er anc giudair la buna cumpagnia cun auters.

Mariuschla Marmotta, Curaglia, 18 onns: Jau hai emprendì d'enconuscher in hot tip, però el è in Engiadinais (da Scuol). Quant gronda è la schanza ch'i dat ordlonder ina relaziun?

**FMR:** Chara Mariuschla Marmotta, damai, quai è natiralmain cumplitgà, ma betg nunpussaivel. La distanza da Curaglia enfin Scuol è tenor la app da la SBB var quatter uras. Ma hey, sch'igl è propi l'amur da tia vita, lura va per el! Engiadinais hin oder her.

Chasper Parolaccia, Zuoz, 23 onns: Oh na, ils schurnalists dad RTR fan films da mai cur che jau sun sturn. Tge poss jau far per betg vegnir en in film?

**FMR:** Char Chasper, prenda ina biera chauda e derscha sur il chau giu al fotograf. Ma adatg cun demolir la camera. Quels han magari buns advocats. E la fin finala: Uschè nausch nun èsi, sche ti es sin ina u l'otra fotografia – Quella pos ti lura mussar in bel di a tes nevs! Ma il pli simpel tric per betg vegnir filmà dad RTR: Discorra tudestg!

Peder «Platzhirsch» Candroia, Savognin, 27 onns: Jau vuless schon daditg laschar far in grond tattoo dad ina vatga-mamma sin mes bratsch. Datti ina pussaivladad da far quai a l'Open Air?

**FMR:** Char Peder Platzhirsch. Tenor ils organisateurs na datti nagin studio da tattoo. Persuenter porscha l'Open Air Lumnezia bleras autras pussaivladads da sa divertir, per exempel cun stans da sponsurs, da la GKB u dad RTR, ma era pitschnas fieras e blers stans da mangiar e da baiver.

Beat «canona» Spurtino, Trun, 19 onns: JAU VULESS EXNUM TURNAR da l'Open Air CUN MES schnittig cabriolet. FA LA POLIZIA CONTROLLAS A VELLA?

**FMR:** Char Beat canona: Lascha meglier a chasa tes vehichel! E prenda enstagl cun tai ina gronda chista biera. Però adatg: Tenor ils organisateurs dastgas ti prender cun tai maximalmain trais liters, u in but da 5 liters. Ed anc ina giada adatg: Vaider e stgatlàs d'aluminium èn scumandads. Prenda cun tai be PET u tetrapacs.

Talina Taliana, Andeer, 23 onns: Jau less mussar a tuts quant cool che l'OA Lumnezia è. Nua è il meglier lieu per far in post sin Tiktok? E datti insumma WLAN a l'Open Air?

**FMR:** Chara Talina. Tenor ils organisateurs na datti betg WLAN, però Degen n'è betg dal tut a la fin dal mund ed i dat ina buna rait!

Seraina Uriniala, Surava, 20 onns: La tualetta è plaina cun ina gronda colonna. MA JAU STUESS UNBEDINGT... Nua poss jau ma zuppar il meglier?

**FMR:** Chara Seraina, l'emprim simpel tric è: Va simplamain 15 minutas avant che la scufla s'annunzia vers ils toi toi. Uschia pos ti evitar quel stress e spetgar cun tutta calma en la colonna. Tenor ils organisateurs (Catia Tschuor) è il meglier temp dad ir sin tualetta – durant il concert da las Liricas Analas! Lura n'è segir nagin là! Toi toi toi!

\* \*Ils nums èn sa chapescha inventads e casuals. \* Sin la homepage da l'Open Air Lumnezia chattas ti anc ulteriuras informaziuns.

\* Sche Vus vulais star sin il current tge che curra e passa a l'Open Air Lumnezia, lura chattais Vus sin rtr.ch ina gronda purschida da fotografias, videos u livestreams.